

CONGREGATIO DE CAUSIS SANCTORUM

TERGESTINA

BEATIFICATIONIS et CANONIZATIONIS

SERVI DEI

PLACIDI CORTESE

(in saeculo: NICOLAI)

SACERDOTIS PROFESSI ORDINIS
FRATrum MINORUM CONVENTUALIUM

(1907-1944)

DECRETUM SUPER VIRTUTIBUS

“Luceat lux vestra coram hominibus, ut videant vestra bona opera et glorificent Patrem vestrum, qui in caelis est” (Mt 5, 16).

Omni tempore historiae, Ecclesia Dei numquam hominibus caruit sedulis virtutibusque plenis, qui gestibus ostenderent eam, fulgidam civitatem supra montem positam, omnibus egenis adesse eosdemque, ut Christi solacium multipliciter reciperent, curare. Sic evenit, difficilioribus vigesimi saeculi temporibus, per Servum Dei

Placidum Cortese (in saeculo: Nicolaum), religiosum sincerum et caritatis usque ad mortem exemplum, quo laus Patrem, qui in caelis est, decet.

Servus Dei natus est die 7 mensis Martii anno 1907 Chersi, hodie in Croatia. Religiosam vocationem percepit ac Fratrum Minorum Conventualium ingressus est Seminarium in Campo Sancti Petri, apud Patavium. Simplicilium votorum professionem emisit atque Chersum redivit, ut in Sancti Francisci Collegio lycei studia ageret. Inde Romam missus est ad theologiam formationem perficiendam. Die 4 mensis Octobris anno 1928 sollemnem professionem emisit ac die 6 mensis Iulii anno 1930 ordinatus est presbyter.

Aliquot annis confessoris munus explevit in Basilica Sancti Antonii Patavii, dein Mediolanum tralatus est in ecclesia Immaculatae et Sancti Antonii, cuius conditio tunc erat complenda. Anno 1937 in Basilica Sancti Antonii Patavii denuo erat, uti commentarii, quod Italice *Il Messaggero di Sant'Antonio* inscriptum est, moderator. Eodem anno et Custos nominatus est Provinciae Patavinae. In conventum Sancti Francisci Chersi anno 1940 est transmotus.

Secundi mundani belli tempore, Nuntii Apostolici Italiae mandatu, Liburnos Slovenosque Italicis carceraliis in castris deportatos adiuvit, in primis in loco v.d. *Chiesanuova*, non longe a Patavio. Plurimis, quos nazistae persequebantur, ut fugam peterent, auxilium praebuit. Quapropter multum periclitatus est. Nam die 8 mensis Octobris anno 1944 comprehensus est a publicis, qui Germanice *Gestapo* appellabantur. Inde Tergesti castris stativis militum, qui pariter *SS* nomen habebant, inductus est, ubi, acerbissime tortus, primis diebus mensis Novembris obiit.

Servus Dei omnia mente Domino defixa continuataque precatione agebat, quam Eucharistiae celebratione ac in Mariam Sanctissimam et Sanctum Antonium devotione alebat. Inter eius cotidianas agendas res et in altitudine interioritatis eius, Deus principatum obtinebat. Simplicitate, mansuetudine et constantia sacramenta ministrabat maximeque animas cum Deo reconciliabat. Multum pati debuit, sed in angustiis numquam fractus est animo. Se Iesu Christo semper committebat atque misericordia Dei ei et aliis spei erat causa. Iam a iuventute, ut caritati Dei omnino responderet, studuit necnon cupiditatem bonum agendi continenter inter se colebat. Patientia et benevolentia pauperes recipiebat, quorum suscipiebat necessitates. Cibaria, vestes et alia largiebatur familiis ac laborantibus. Milites, actiones eius rei publicae causa agitas probabiliter interpretantes, in vincula duxerunt eum, at vero Servum Dei caritas tantum impellebat. Consilia evangelica excellenti modo exercuit, ita ut suam Franciscali in familia vocationem perficeret. Certas altasque propter eius virtutes, vera sanctitatis circumdatus est fama.


Qua numquam imminente, Servi Dei instituta est Causa beatificationis et canonizationis. Apud Curiam ecclesiasticam Tergestina a die 29 mensis Ianuarii anno 2002 ad diem 15 mensis Novembris anno 2003 Inquisitio dioecesana celebrata est, cuius iuridica validitas ab hac Congregatione de Causis Sanctorum per decretum diei 4 mensis Iunii anno 2010 est approbata. Et Inquisitio suppletiva habita est a die 18 mensis Iunii ad diem 25 mensis Octobris anno 2012, quam de iure validam haec eadem Congregatio per decretum agnovit die 17 mensis Maii anno 2013. Positione confecta, necnon Consultorum Historicorum iudicio die 31 mensis Ianuarii anno 2017 subiecta, disceptatum est, iuxta consuetudinem,


an Servus Dei virtutes christianas heroico in gradu excoluisset. Consultores Theologi adfirmative locuti sunt die 24 mensis Martii anno 2020. Patres Cardinales et Episcopi, diei 6 mensis Iulii anno 2021 Ordinaria Sessione occurrente, Servum Dei professi sunt theologales, cardinales iisque adnexas virtutes heroico more exercuisse.

Facta demum de hisce omnibus rebus Summo Pontifici Francisco per subscriptum Cardinalem Praefectum accurata relatione, Sanctitas Sua, vota Congregationis de Causis Sanctorum excipiens rataque habens, hodierno die declaravit: *Constare de virtutibus theologalibus Fide, Spe et Caritate tum in Deum tum in proximum, necnon de cardinalibus Prudentia, Iustitia, Fortitudine et Temperantia iisque adnexis in gradu heroico Servi Dei Placidi Cortese (in saeculo: Nicolai), Sacerdotis professi Ordinis Fratrum Minorum Conventualium, in casu et ad effectum de quo agitur.*

Hoc autem decretum publici iuris fieri et in acta Congregationis de Causis Sanctorum Summus Pontifex referri mandavit.

Datum Romae, die 30 mensis Augusti a. D. 2021.


MARCELLUS Card. SEMERARO
Praefectus

+ 
✠ FABIUS FABENE
Archiep. tit. Faliscodunensis
a Secretis